



PIARRES XARRITON EUSKALTZAINA UEU-REN SORBIDEEI BURUZ LUZAZ MINTZATU ZEN ATZO SARRERA HITZALDIAN

UEUk ateak zabaldu ditu

Aurtengo Udako Euskal Unibertsitateari atzo eman zitzaion hasiera Baionako saioekin. Mikel Aizpuru UEUko zuzendariak ongi etorria eman ondoren, Piarres Xarritonek sarrera hitzaldia eskaini zuen. Bertan UEUren sorbideak aipatu zituen. Dagoeneko 260 ikaslek dute izena emana Baionako ikastaroetan parte hartzeko.

Arantxa Hirigoien / Baiona

ATZO goizean, Mikel Aizpuru UEUko zuzendariak ongi etorria eman zien aurtengo udako ikastaroetara hurbildu diren ikasle eta irakasleei. Sarrera hitzaldian aurtengo UEUk zilarrezko ezteiak bete dituela gogoratu zuen. «Garai hartan finkatu ziren xede guztiak ez dira bete», azaldu zuen Mikel Aizpuru. «Oraindik ez dugu euskaraz bakarrik dabilen unibertsitate lortu, baina gauzak asko aldatu dira» azpimarratu zuen UEUko zuzendariak. Aldaketa horien artean bi aipatu zituen bereziki. Lehenbizikoa parte hartzaileen kopuruari dagokio: 1973. urtean 80 ikasle bildu ziren Donibane-Lohizunen; aurtengo, aldiz, 1.000 ikasle espero dira. Bigarren aldaketa ikasketen buruzkoa da. UEU antolatu zen lehen urtean ikastaro bakarra eskaini zen. 25 urteren buruan, ikastaroak 40 sailetan daude banatuak.

Bestalde, iazko ildo beretik segituz, Baionako ikastaroak Iparraldeko eta Hegoaldeko ikasleei zuzenduak dira. Hautu horrek UEUri nazionaltasuna ematen diola adierazi zuten antolatzaileek. Ikuspegi horren eragina aurtengo izen-emate kopuruan ageri da, Baionan inoiz baino partaide gehiago elkartu baita. Azken datuen arabera, 260 ikaslek emana dute izena atzo hasi ziren ikastaroetan parte hartzeko.

UEUko zuzendariaren ondotik, Piarres Xarriton euskaltzainak hartu zuen hitza. Orain duela 25 urte baino gehiago iragandako oroitzapenak hizpide harturik, Xarriton UEUren sorbideez luzaz mintzatu zen. Udako Euskal Unibertsitatea sortu aitzineko garaiez hitz egin zuen. 1970, 1971 eta 1972. urteetan Baionan iragan ziren Euskal Asteen berri eman zuen. Euskal Aste haietan antolatutako ziren mahai-inguruetan eta ikastaroetan parte hartu zuten irakasleak aipatu zituen. Hainbat jende ospetsuren izenak entzun zituen. «Garai hartan hizlariak unibertsitarioak edo mundu horretan ibiltzen zirenak izaten ziren, eta entzule gehienak ere hala ziren», azaldu zuen Piarres Xarritonek. Aste haietan udako unibertsitate baten beharra sentitu zen. Hortik atera zen, beraz, udan ikastaroak antolatzeko ideia. Piarres Xarriton bera da garai haietan euskal unibertsitatearen alde lan handia egin zutenetarik bat.

Urte bakoitza banaka hartuz Baionan iragan ziren Euskal Asteetako giroa azaldu zuen.



Piarres Xarritonek —argazkian erdian— egin zuen hasiera hitzaldia.

UEU

Aukera handia aurtengo

ASTE osoan 260 ikaslek hartuko dute parte UEUk proposaturiko sailetan. Bost egunez Baionan iraganen diren ikastaroen zerrenda ugaria da aurtengo. Ikasgaien artean fisika, sexologia eta historia lehen aldikotz aurkeztuak dira Lapurdiko hiriburuan. Datuen arabera, zientzia sailen artean gaiek dute arrakasta handiena, oraindik bederen.

Atzo eskainitako sarrera hitzalditik landa, ikasle guztiak bakoitza bere gelan sartu dira lanean hasteko. Aurtengo Baionako ikastaroan bi sail nagusi badiara: giza eta gizarte zientziak alde batetik, eta zientziak bestetik. Sail bakoitzean, berriz, hainbat gai eskaintzen dira. Lehenbizikoa, didaktika, glotodidak-

tika, grafologia, historia, hizkuntzalaritza, kazetaritza, literatura, sexologia eta soziolinguistikari buruzko ikastaroak jarrai daitezke. Bigarren, fisikika eta natur zientziak dira ikasgaiak. Orotarat, 11 aukera aurki daitezke. Ikasgai guztiak ez dira ber egunean hasi. Atzo, adibidez, literatura, soziolinguistika, sexologia, historia eta natur zientziak eman diote hasiera ekitaldiari. Datuen arabera, azkeneko gaiek lortu du arrakastarik handiena, 56 partaiderekin. *Basa-bizitzaren kudeaketa* izenburupean, Joserra Aihartza Euskal Herriko Unibertsitateko Zientzia fakultateko irakasleak aurkeztu zuen gaia.

Soziolinguistikan,

berriaz, Erramun Baxok Euskal Kultur Erakundeko lehendakariak Ipar Euskal Herriko Soziolinguistikako inkestaren berri eman zuen. Iaz buruturiko inkestaren emaitzek aurtengo urtearen utzi dute zein diren hizkuntzaren berreskurapenerako ardatz nagusiak. Hurrengo egunetan sakonduko diren gaien testuingurua eskaini zuen Erramun Baxok.

Gerardo Markuleta literatura idazlea eta itzultzaileak hasi zuen ikastaroa, *Literatura zaletasunaren didaktika* izenburupean. Ikastaroan teoria eta praktika, esperientziak, errezetak, materialak eta bibliografia azalduko dira. Sexologia, aldiz, Elisabeth Olaskoaga Irusta kolektiboko sexologoak

sexualitatearen kontzeptuak azaldu zituen. Azkenik, historian Iban Zaldia EHUko eta UEUko Historia sailburuak hasiera eman zion ekologia eta historia ikastaroari.

Gaur, gai hauek guztiak jarraituko dute, eta grafologia ikastaldia hasiko da. Iruñe Ibarra psikologo eta grafologoak idazkera aztertuko du.

Ikastaro bakoitzak zenbait kreditu edo puntu ditu. Sailaren arabera, batetik hirurako kreditu kopurua lor dezake ikasleak. Kreditu horiek Euskal Herriko Unibertsitateko (EHU) ikaslea izanik geroko baliagarri izanen zaizkio. Baionako Fakultateko ikasketetarako, aldiz, ez dira oraindik baliagarri

1970. urtean aste osoan 20 mintzalari eta 80 entzule elgarretatu ziren. Lehenbiziko astea IKAS eta Fededunak garai hartako bi elkarteek antolatu zuten. «Hain berean Iparraldeko eta Hegoaldeko jende gaztea bildu zen», adierazi zuen euskaltzain hazpandarrak. Gaiak dagokienez, antzerkia, historiaren eta ikus-entzuzko tresnen aurrerapenari buruzko solasaldiak izan ziren entzungai.

Hurrengo urtean, euskal aldizkariak, pastoralak eta ikastolen egoera jorratu ziren, besteak beste. 1972. urtean, ekonomiari buruzko hitzaldiak antolatu ziren eta euskal literaturaren historiari mintzatu ziren. Azkenik, euskal unibertsitate baten sortzeko ideia Karlos Santamariak zabaldu zuen; hain zuzen ere, gaur egun UEU dugu egitasmo horren fruitua.

Xarritonek eskainitako sarrera hitzaldi horretan urte haietan bizi izadako esperientziak leku handia hartu zuen. «Adinako zeregina gazteei historia helaraztea da, nondik gatozen jakin dezagun», erran zuen. x